

2 TIMOTI

Faulo yana kiluma 'ana veluga Timoti 'waineye.

De'e Timoti yana leta 'ana veluga. Letanina Faulo i kilumi Loma 'wainega tutuyanina i miamia vanuga 'eba yogona nageneye. I yatoiga vanuga 'eba yogona 'waineye fai i lalau'age Iesu Keliso faifaina. Faulo i nuani sai'afoga i na luwewafai, bega tutuyanina 'waineye de'e leta i kilumi.

Timoti Faulo 'ana to'aivaita taiadi i folofolova wata taunina tovetumaganavo Efeso 'waineye 'adi to'isave'avina. Timoti wata Faulo ma fuedie i vetumagana Keliso 'waineye bega i ve'awa-natuneni. De'e letanina nageneye Faulo i veifufu yana nuakalikali Timoti 'waineye faifaina wata vitanidi Keliso 'ana tovedumwe'ai'ai 'waidiega, nuanuana 'waidie i na tokemaigeni. Wata Faulo nuanuana Timoti taunina i na tauyeni ve tonovidi 'waidie. Letanina 'ana 'idi side bani'odi.

Faulo yana vekaiwa Timoti 'waineye. 1:1-2

Faulo yana vekaiwa Timoti i vetumaganaga faifaina. 1:3-7

Timoti i lubwaineni ma yana tokemaiga i na dumwebika yana folova 'waineye. 1:8–2:13

Tugusa i na veda ava'aibe bei mogitana Keliso yana tofolova. 2:14-26

Tutuya 'ana 'eba ve'a'ava 'waineye, tomotoga yadi sakona i na vebwaika-'afo'afo. 3:1-9

Faulo yana velu'ase'ase wata yana matakia Timoti yana folova faifaidi. 3:10–4:5

Faulo 'ana vebae wata yana nuanua. 4:6-18

Yana 'alanuai wata yana vekaiwa 'ifwaidi. 4:19-22

1 ¹ Yau Faulo a vekaiwa Timoti 'waimuye. Yaubada nuanuana bega a vetomata'aulele Iesu Keliso faifaina. Basenadi i vona'awaufaufa egavo i na miave'itubama Iesu Keliso taiadi mia 'atumaina wata miamia-vagaina i na veluagai, faifainanina i vetuneku a lalau'age.

²Timoti, a nuakalikaliemu wata a ve'awa-natunemu. 'Omu mogitana bani'odi natuku, begaidi a vevelu'ui faifaimu nuanuaku Yaubada Tamada wata Iesu Keliso 'ada Toveimea ma yadi nuakalikali i na vevesauluva 'atumaina 'waimuye wata i na 'i'isanuakalikaliemu. Wata nuanuaku yadi nuanua bikana i na velevelemu, mia 'atumaina taiadi.

Faulo i velu'ase'ase wata i vekaiwa.

³Timoti, tutuya fueidi, lovana wata 'aiata ma yaku vekaiwa faifaimu a vevelu'ui Yaubada 'waineye. Basenadi tubukwavo i vetofolova Yaubada 'waineye yau wata 'asiau bega 'aku vebae 'wainega a lutonovi yaku sauluva tonovidi mataneye. ⁴Yamu 'we'wela a nuanuani tutuyanina a 'iawemu bega nuanuaku bwaikina wata a na 'isemu a na sosoana. ⁵Yamu vetumagana mogitana Keliso 'waineye a nuanuani, bani'odi inamu Iunisi wata nagami inadi Losi yadi vetumagana. Bega a 'asetamu yamu vetumagananina i 'eno'eno fa'alina. ⁶Basenadi nimaku a yatoi 'waimuye a velu'ui, Yaubada tamu nuakalikali i velemu yamu folova faifaina. Fai yamu vetumagana mogitana i 'eno'eno, nuanuaku nuakalikalinina 'u na sisi'augi. ⁷U na sisi'augiga fai 'Anu'anunu 'Atumaina Yaubada i veledaga kebu yada 'eba ve'awamayamayaga, yana 'aivaita 'wainega ta vevetoketoke, ta nunuakalikali wata taunida yada sauluva ta 'i'isave'avinidi.

⁸Toketokena i velemuga, bega 'ada Toveimea Keliso 'ana vetolu'ivona faifaina kebu 'u na bunumayaga, wata yau Keliso faifaina vanuga 'eba yogona 'waineye a miamia, kebu 'u na bunumayageku. 'U na vevetolu'ivonaga Iesu Valana 'Atumaina faifaina, vita 'u na veveluagadi yau bani'odi, siwe kebu 'u na kolologa 'u na tokemaigemu fai Yaubada toketokena i na velemu, 'amu vita 'adi fata bani'odi. ⁹⁻¹⁰I 'ita'ita'ieda sakona 'waidiega i goleda bega yada sauluva i na ve'atumai mataneye. Kebu tamu yada folova 'atumaina faifaina i da venuma'ivineda, fai taunina yana nuanua wata yana nuakalikali 'waidiega. Bola fwayafwaya kebu i da 'idewaiga, nuakalikalinina i veleda Iesu Keliso 'wainega we'e 'asiau Iesu Keliso 'ada To'ita'ita'i yana mai 'wainega nuakalikalinina i vemageta. I vemagetaga fai wafa yana toketokena Keliso i ve'a'avai wata Valana 'Atumaina 'wainega mia 'atumaina wata miamia-vagaina i sivemageseni.

¹¹Yaubada yana venuma'ivinayega i veimeyeku Valanina 'Atumaina faifaina a vetomata'aulele, a vevetolu'ivona wata a vetove. ¹²A vetolu'ivonaga begaidi vita a veveluagadi a miamia vanuga 'eba yogona 'waineye, siwe kebu tamu sai'afo a da bunumayaga fai a nuani wata a 'asetai taunina 'waineye yaku vetumagana a yato-vagaseni. A 'asetai

^a 1:2 1 Tim 1:2 ^b 1:3 Fol 24:16 ^c 1:5 Fol 16:1 ^d 1:7 Lom 8:15 ^e 1:8 Lom 1:16
^f 1:9 Efe 2:8-9; Tai 3:4-5; 1:10 Ibu 2:14-15 ^g 1:11 1 Tim 2:7

mogitana nani matatabuna a 'anivelenedi 'waineye i na 'i'isave'avinidi i na nagoga yana 'Aiata Bwaikina 'waineye i na vila-vaitugani.

¹³ ^hFai ta miave'itubama Iesu Keliso taiadi, ta nuakalikali wata ta vetumagana 'waineye, begaidi nuanuaku ve tonovidi 'waikuyega yamu 'eba 'isa, 'waidiega 'u na veve tomotoga 'waidie. ¹⁴ Naninidi 'atumaidi Yaubada i velemuga 'u na 'i'isave'avinidi 'ada labilabina 'Anu'anunu 'Atumaina yana toketokena 'wainega.

Faulo enavo fuei i degalovei.

¹⁵ ⁱAkonadi 'u 'asetai tutuyanina vanuga 'eba yogona 'waineye i yatoku tovetumagana matatabudi 'awalawa Eisia nageneye i degaloveku, tomotoganidi 'waidiega 'adi 'ailuga side 'adi wagava, Fisilasi wata Elimotini.

¹⁶ We'e tamu, 'ana wagava Onesifolasi tutuyanina a miamia vanuga 'eba yogona 'waineye kebu i da bunumayageku. I viwai i fogefogeku wata i 'ivesosoaniku begaidi a vevelu'ui nuanuaku Yaubada i na vesauluva 'atumaina taunina wata yana 'aila'a 'waidie. ¹⁷ Tutuyanina i le'wa Loma, i lualeku i nagoga nika i veluagaku. ¹⁸ 'Awaie Keliso yana vila-vaitugana 'waineye, nuanuaku 'Auvea i na nuakalikalieni. We'e tutuyanina 'a miamia Efeso yana 'aivaita 'waikuye 'akonadi 'u 'aseta'a'avadi.

Vita 'waidie ta na tovoi fa'alina Keliso faifaina.

2 ¹ Natuku Timoti, a na vonemu. 'Ida ta miave'itubama Iesu Keliso taiadi, begaidi nuanuaku yana nuakalikali i velemuga 'wainega 'u na vetoketoke. ² Basenadi a lalau'age tomotoga fuei 'waidie bonaku 'u noganogai. Nuanuaku tomotoga 'ifwaidi ma 'adi vetumagana 'u na venua'ivinedi, yaku vonanidi 'u na ve 'waidie bega i na nagoi i na vetolau'age venidi faifaidi.

³ 'Ida tovetumagana ta vetolugavia Iesu Keliso faifaina, vita ta na veveluagadi. Vitanidi 'waidie 'u na tovoi fa'alina Keliso faifaina 'u na lugavia 'atumaina. ⁴ Tolugaviavo matatabudi nuanuadi 'adi to'edakumeta i na kiavesosoani, begaidi lugavia 'atumaina 'aisena faifaina i nuanua kebu nani 'ifwaidi faifaidi i na nuanua. Wata 'omu bani'odi, 'u na vevetalaga 'atumaina bega 'amu to'edakumeta i na sosoana faifaimu. ⁵ ^jU na folofolova Keliso faifaina, yana veimea 'u na vematayakeyakedi bani'odi to'wava 'ai'edi 'wava 'ana veimea i na vematayakeyakediga bola i na kumeta tutula i na 'ewai. ⁶ ^kOmumu 'u na vetoketoke Keliso faifaina bani'odi tobakula dumwena bikana, kumanina i lubwaineni 'ani'ani bwaikina i na veluagai yana folova 'ana tutula. ⁷ 'Eba 'isanidi 'aitonu a voneyediga faifaidi nuamu i na 'ivina nika 'Auvea yana 'aivaita 'wainega nuamu i na magetai 'u na 'asetai bani'odi 'u na vesauluedi.

^h 1:13 Tai 1:9 ⁱ 1:15 2 Tim 4:16 ^j 2:5 2 Tim 4:8 ^k 2:6 1 Kol 9:7,14

8^lU na nuani Iesu, Yaubada 'ana Venua'ivina Kini Devida 'ana wauma 'wainega i souyeni, i wafa siwe Yaubada i sivetovoia wafayega. Valana 'Atumaina kumanina yau a lulu'ageyeni. 9-10^mValanina faifaina vita a veluagadi, i yogoniku bulava kainumu 'waidiega yau 'wa da vo tosakona. We'e Yaubada yana Vona kebu yogoyogoninaga begaidi a tokemaigeku vita matatabuna 'waidie bega tomotoganidi Yaubada i venua'ivinediga ma fuedeye 'ita'ita'i ta na veluagai. 'Ita'ita'inina Iesu Keliso 'wainega wata 'ai'aiwabu-vagata taiadi ta na veluagadi. 11ⁿVona de'e vona mogitana, 'Ai'edi Keliso taiadi ta wafaga, bola taiadi ta na mia-vagata.

12^o'Ai'edi vita 'waidie faifaina ta na tokemaigedaga, bola taiadi ta na veveimea.

'Ai'edi ta na vedumwe'ai'aieniga, bola i na vedumwe'ai'aieda.

13^p'Ai'edi yada vetumagana i na mwea-'afo'afo, kebu i na bailedaga, fai kebu 'ana fata yana vona'awaufaufa 'waideye i na geudi."

Yaubada nuanuana yana tofолоvavo side bani'odi i na folovedi.

14^qNaninidi Keliso faifaina a voneyediga, yamu tomotoga nuadi 'u na totolinuata'idi, wata Yaubada mataneyeye 'u na talabodedi bega vona nani-'avo'avovo faifaiddi kebu i na ve'ikwayekwayega. Ve'ikwayekwayega kebu tamu aitoi 'ana 'eba 'aivaita, tonogaya 'adi 'eba 'ivesako. 15^rYamu folova 'waineyeye 'u na dumwebika bega bola Yaubada mataneyeye i na awave'atumaitemu nika kebu 'u na bunumayaga. I lubwainemu Yaubada yana Vona Tonovidi 'u na 'aseta-'atumaidi bega 'waidiega 'amu fata tomotoga 'u na 'i'ivaisedi. 16^sVe'ikwayekwayega nani-'avo'avovo faifaiddi 'u na bailedi, i na nunago 'wainega tomotoga Yaubada i na mia'iwani. 17^tTove'ikwayekwayega yadi vona bani'odi bonu sakoina i na vebwaika-'afo'afo nika 'wainega wafa i na souyeni. Tomotoganidi 'waidiega 'adi 'ailuga i veve-vekavekali, 'adi wagava Aiminio wata Filitasi. 18^uYaubada yana nuanua tonovidi 'ana 'eda'eda 'wainega i vuyo, tovetumaganavo i 'ivenuanalugadi yadi vetumagana i 'ivemweadi fai i vo, Ta vetumaganaga Iesu 'waineyeye 'akonadi ta yawasa-vaitugana, we'e 'awaie ta na wafaga kebu ta na tovoi wafayega." 19^vBani'odi i voneyediga siwe Yaubada yana Vona fa'alina i 'eno'eno kilu'wau'wauga bani'odi kebu 'ana fata tamu aitoi i na ketoi. Yana vonanina fa'alina side bani'odi.

'Auvea yana tomotoga 'akonadi i 'asetadi."

Wata i vo,

Egavo i na vo, 'Ima 'Auvea yana tomotoga," i lubwainedi sauluva sakoidi i na vedumwe'ubu'ubusedi."

^l 2:8 Lom 1:3-4 ^m 2:9 Fil 1:12-14; 2:10 Kol 1:24 ⁿ 2:11 2 Kol 4:11 ^o 2:12 Mad 10:33

^p 2:13 Lom 3:3-4; Num 23:19; Tai 1:2 ^q 2:14 Tai 3:9 ^r 2:15 Tai 2:7-8

^s 2:19 Ion 10:14-15

Fai de'e bani'odi Yaubada yana Buki i voneyediga, ta 'asetai yana Vona fa'alina, ve-vekavekali kebu 'ana fata i na fetoi.

²⁰ 'Ai'aiwabu yadi vanuga nagedie 'aivoe wata nau fuedi. 'Ifwaidi 'adi tutula bwaikidi we'e 'ifwaidi fwayafwaya wata welavi 'waidiega i 'idewadi. 'Adi tutula bwaikidi wakawaka faifaidi, we'e fwayafwaya wata welavi i 'idewadiga, 'aivoe-'avo'avovo wata laugaina. ²¹ 'Aivoenidi tomotoga bani'odi. 'Ai'edi aitoi sakona i na bailediga bani'odi 'aivoe tutulidi bwaikidi i yato'idiedi tomotoga bwaikidi faifaidi. Taunidi yadi sauluva i na ve'atumaiga Keliso 'ana fata i na folovedi yana nuanua 'atumaidi tulina tulina faifaidi.

²² Tubuvauvau yadi sauluva tutuya fuedi bunu 'ana nuanua sakoidi faifaidi i nunuagiva, we'e 'omu Timoti kebu bani'odi 'u na munega, nuanuaku nuanuananidi 'u na degalovedi. We'e mogitana i lubwainemu 'u na tokemaiga sauluva 'atumaidi 'waidie, bani'odi sauluva tonovina, vetumagana toketokena Yaubada 'waineye, nuakalikali wata nuanua bikadi. 'Ai'edi bani'odi 'u na munega, tomotoganidi yadi sauluva tonovidi bega nuanuadi bwaikina Yaubada, yadi sauluvayega 'u na nunago. ²³ Tomotoga 'ifwaidi igodi i vo, Ma yama 'asetai," nuanuadi i na veve'ikwayekwayega nani-'avo'avovo faifaidi, 'u na bailedi fai ve'ikwayekwayega 'waidiega ve'alamagi'ai i sousouyeni. ²⁴ 'Auvea yana tofologa i na veve'alamagi'aiga kebu i da lubwaineni, we'e mogitana tomotoga matatabudi i na nuakalikali, Yaubada yana Vona i na veve 'atumaina wata yana tofologavo taunidi tonuakalikali, tove 'atumaidi wata i na totokemaiga. ²⁵ Vona bikadiega tovekali yadi nuanua i na kiavetonovidi bega voke Yaubada i na tauyedi i na nuaviladi yana nuanua tonovidi i na 'asetadi. ²⁶ Tutuyanina i na nuaviladiga, yadi nuanua i na tonova-vaitugana, Seitani 'wainega i 'etodaba. Tovekalinidi Seitani yana nigole i dikwanidiga, yogoyogonidi i miamia bega yana nuanua i na 'i'idewadi.

Tutuya vitadi faifaidi.

3 ¹ Nuanuaku 'u na 'asetai, Iesu yana vila-vaitugana i na velilivanaga tutuya vitadi i na souyedi. ² Tutuyanina 'waineye tomotoga i na veveumokai, nuanuadi kukua fuedi wata taunidi i na kikialakaidi. Taunidi tonualaka, tomanini-'avo'avovo, tamadiavo wata inadiavo i na vevedumwe'ai'aiedi, kebu 'adi to'aivaita i na tutulidiga, wata Yaubada i na vevedumwe'ai'aieni. ³ Kebu i na nuakalikaliga, kebu nuanuadi veiana, taunidi tovebonaivo wata kebu yadi sauluva i na 'i'isave'avinidiga. Taunidi tove'isakololo wata nani 'atumaidi matatabuna 'adi tovedumwe'ai'ai. ⁴ Tomotoganidi to'etogiluva, taunidi kebu nagami

† 2:20 Lom 9:21 † 2:24 1 Tim 3:3 † 3:1 1 Tim 4:1 † 3:2 Lom 1:29-31

i da vevenua'ivina 'atumaina nika yadi sauluva 'waidiega ediavo vita i veveluagadi, i na vevebaisa, kebu nuanuadi Yaubada wata yadi nuanua bwaikina sosoana-'avo'avovo. ⁵xTomotoga fuedi 'adi 'isa 'wainega 'wa da vo totafalolo siwe Yaubada wata yana toketokena i baila. Timoti, nuanuaku tomotoganidi sakoidi 'u na bailedi.

⁶Tomotoganidi 'ifwaidi i nunagoi mali tomotoga yadi vanuge vevine yadi vetumagana mweadi yadi ve-vekavekali 'waidiega nuadi i 'ewa'ewadi. Vevinenidi 'adi vebae 'waidie vita i lulutonovi yadi sakona faifaiddi, siwe yadi nuanua bwaikina sakona tulina tulina. ⁷Ve tulina tulina 'waidie i vevetumagana we'e Yaubada yana nuanua tonovidi kebu 'adi fata i na 'asetadi. ⁸Tosakonanidi Yaubada yana nuanua tonovidi 'adi tovedumwe'ai'ai bani'odi basenadi Itifita 'waineye Ianisi wata Iamilisi Mosese taiadi i ve'ikwayekwayega me Isileli 'adi vagavai faifaina. Tosakonanidi wata tomotoganidi 'adi 'ailuga nuadi 'anigaugaudi i vevekali igodina Yaubada 'waineye i da vevetumagana. ⁹Yadi vekalinidi kebu 'adi fata wata i na 'i'idewadi fai 'awaie tomotoga matatabudi yadi sauluva i na 'asetadi bani'odi Ianisi wata Iamilisi yadi sakona.

Velu'ase'ase 'ana 'eba ve'a'ava.

¹⁰⁻¹¹yWe'e 'omu Timoti, yamu sauluva kebu bani'odi tosakonanidi. Yaku ve, yaku sauluva, wata yaku nuanua 'u vevetutuyamedi. Yaku vetumagana Keliso 'waineye, yaku tokemaiga, yaku nuakalikali 'u 'ise'isedi, wata tutuyanina tomotoga vita fuedi i veleveleku a veveviga Yaubada faifaina a tokemaigekumo. Naninidi matatabuna i souyedi 'waikuye Anitioki, Ikoniami, wata Lisitala 'waidie 'akonadi 'u 'asetadi mogitana vita bwaikaotogidi a veluagadi Keliso faifaina tomotoga 'waidiega, siwe naninidi 'waidiega 'Auvea i 'ita'ita'ieku. ¹²zEgavo nuanuadi taunidi i na tauyedi Iesu Keliso 'waineye bega yadi sauluva tonovidi Yaubada mataneyeye, matatabudi vita bwaikina i na veveluagadi. ¹³We'e tosakona wata tovekali 'eba velamuyega i na sakona i na nagoga i na vebwaika-'afo'afo, i na vevekali we'e tomotoga 'ifwaidi wata i na vevekaliedi. ¹⁴aWe'e 'omu, naninidi tonovidi 'adi ve 'u 'ewadiga, ma yamu vetumagana 'u na 'i'idewadi fai 'amu tove ma 'adi 'aseta 'waimuye. ¹⁵Basenadi siaimuye Yaubada yana Vona Magemagetadi i ve 'waimuye 'u 'asetadi, vonanidi 'waidiega 'ana fata 'aseta 'u na 'ewai 'ita'ita'i faifaina Iesu Keliso 'ana vetumagana 'wainega. ¹⁶bYaubada yana Vona kilukilumidi matatabuna lamuna taunina yana nuanua 'wainega. 'Ada laubwaina nani tonovidi ta na 'asetadi, wata 'wainega vekali ta na talabodedi. I na ve 'waideye bani'odi ta na munega sakona ta na bailedi

x 3:5 Mad 7:15,21; Tai 1:16 y 3:11 Fol 13:50, 14:5,19-20 z 3:12 Ion 15:20
a 3:14 2 Tim 2:2 b 3:16 2 Fit 1:21

wata yada sauluva i na tonova Yaubada mataneye. ¹⁷Yaubada yana Vonanidi 'waidiega 'ida yana tomotoga yada sauluva ta na 'isave'avinidi yana folova 'atumaidi 'aitamogana 'aitamogana faifaidi.

'Awaie tovetumagana 'ada tutula ta na 'ewa.

4 ¹'Awaie Keliso yana vila-vaitugana 'waineye egavo i wafaga wata egavo ma yawaidi i miamiaga i na vonayavuga mataneye, wata yana 'Eba Veimea i na 'idewai, begaidi Yaubada wata Iesu Keliso matadie a na vonemu. ²'Nuanuaku Iesu Valana 'Atumaina 'u na lulu'ageyeni. Tutuya fue di 'u na lalau'agega, 'ai'edi safailina 'alo vitana 'waimuye, 'ai'edi tomotoga nuanuadi 'alo kebu. Ma yamu tokemaiga 'u na veve tomotoga 'waidie, 'u na kikiavetonovidi, 'u na lulumatanidi wata 'u na vevelu'ase'asedi. ³'U na veve fai 'awaie tomotoga fue di i na baila kebu nuanuadi Yaubada yana Vona tonovina i na noganogai, taunidi yadi nuanua 'waidie i na nunago. Nuanuadi tove-vekavekali fue di yadi ve bega naninidi 'adi nogaya 'eba nua'ewa i na noganogaidi. ⁴We'e nani matatabuna tonovidi i na vedumwe'ai'aiedi, yadi nuanua bwaikina ifuifufu-'avo'avovo tubudiavo 'waidiega.

⁵We'e 'omu tutuya fue di 'u na tovoi fa'alina. Vita 'u na veluagadiga tomotoga 'waidiega Keliso faifaina, 'waidie 'u na tokemaiga. Iesu Valana 'Atumaina 'u na lalau'age bega tomotoga taunidi i na tauyedi 'waineye, wata fai 'omu Yaubada yana tofolova, folovanidi i lubwainemu 'u na 'i'idewadi, tutuya fue di 'u na folofolova 'waidie.

⁶'Omu 'u na folofolova Keliso faifaina we'e yau 'akonadi a tauyeku sai'afoga a na wafa 'wa da vo a da 'aniveleneku Yaubada 'waineye velomu faifaina, a na 'iawemu a na laka abame. ⁷Keliso faifaina a vetoketoke, folovanina i veleku 'akonadi 'ana tugusa 'waineye a le'wa. ⁸A vetoketoke begaidi 'aku tutula i 'idewai i yatoi i 'eno'eno. Bola 'Auvea 'ada Toveimea, kumanina yana sauluva tonovina yana vila-vaitugana 'waineye i na veleku. Yaku sauluva matatabuna i na ve'atumai Yaubada mataneye, 'asa'aiana 'aku tutulanina. Siwe kebu yau 'aisekuga, kumanidiavo i nunuakalikalieni wata i lulukamata yana souyagi faifaina, tutulanina i na veledi.

Faulo i veifufu enavo 'ifwaidi faifaidi.

⁹⁻¹⁰Nuanuaku 'u na vewavawava 'u na mai-matayo'o 'waikuye, fai fwayafwaya 'ana nuanua Dimasi nuana i 'ewai, i baileku i nago Tesalonaika. Kelesenisi i nago Galetia we'e Taito i nago Dalimetia. ¹¹⁻¹²^gTikiasa a voneni i nago Efeso, we'e Luke 'aisena taiadi 'a miamia.

^c 4:1 Fol 10:42; Lom 14:9-10 ^d 4:2 Fol 20:20,31 ^e 4:3 1 Tim 4:1 ^f 4:8 Ve 2:10
^g 4:11 Fol 15:37-39; 4:12 Efe 6:21-22

Nuanuaku Malika 'u na voneni taiadi 'wa na mai, fai kumanina 'ana fata i na 'ivaiseku folova fuei 'waidie. ¹³ ^hBasenadi a miamia Tiloasi 'aku talauma a 'iaweni Kafo 'waineye, 'u na mimaiga 'u na mieni, wata 'ifwaidi buki kumanidiavo 'akonadi 'u 'asetadi we'e nuanuaku bwaikina bukinidi 'aisaya bunudiega i 'idewadi, taiadi 'u na miedi.

¹⁴ ⁱAlekisana, kumanina kainumu 'adi to'idewadewa nani sakoina wata bwaikina i 'idewai 'waikuye. Yana sauluvanina faifaina 'awaie 'Auvea i na tutuli 'ana 'isa'isa bani'odi. ¹⁵ Taunimu 'u na 'isave'avinimu tomogonina 'wainega fai ma yana nuasako yama vona i totolivedumwe'ai'aiedi.

¹⁶ Yaku vonayavuga 'ana 'eba velamu 'waineye matatabudi i degaloveku, kebu tamu aitoi i da 'ivaiseku. Nuanuaku yadi sauluvanina faifaina Yaubada i na nuatavunidi. ¹⁷⁻¹⁸ ^jI degalovekuga siwe 'Auvea lilivakuye i miamia, toketokena i veleku bega 'aku fata Iesu Valana 'Atumaina matatabuna a na lu'ivona tomotoganidi kebu Diu 'waidie. Bei i 'ita'ita'ieku vita bwaikidi 'waidiega, wata a 'asetai 'awaie i na 'i'ita'ita'ieku nani sakoidi tulina tulina 'waidiega mulieta i na vagavaiku a na luku abame yana 'Eba Veimea 'waineye.

Yaubada miamia-vagaina wata magemagetana. I lubwaineda ta na subisubiai. Vona mogitana yaku nuanua bani'odi.

Faulo yana 'alanuai.

¹⁹ ^kFilisila, Akwila wata Onesifolasi ma yana 'aila'avo, matatabudi 'u na vonedi yaku vona-vekaiwa 'waidie. ²⁰ ^lElasitasi i miamia Kolinita, we'e Tolofimo Milito 'waineye a 'iaweni fai i viga. ²¹ Nuanuaku 'u na vewavawava 'u na mai-matayo'o mulieta vekaukau 'ana tutuya i na souyeni.

Iubilasi, Fudeni, Laino, Kalodi wata 'ifwaidi tovetumaganavo taiadi yadi vona-vekaiwa i vetunei 'waimuye.

²² Nuanuaku 'ada Toveimea Iesu Keliso 'anu'anunumu 'ana labilabina. Nuanuaku Yaubada ma yana nuakalikali i na vevesauluva 'atumaina 'waimie.

'Asa'iana bani'odi,
Yau Faulo.

^h 4:13 Fol 20:6 ⁱ 4:14 1 Tim 1:20; Lom 2:6 ^j 4:17 Fol 23:11, 27:23 ^k 4:19 Fol 18:2-3
^l 4:20 Fol 19:22